

星
命
總
括

星

斗

星

斗

星命摠括

四庫全書珍本初集

子術

數

部類

欽定四庫全書

子部七

提要

星命總括三卷

術數類五

命書相書之屬

臣等謹案星命總括三卷舊本題遼耶律純撰有純原序一篇末署統和二年八月十三日自稱為翰林學士奉使高麗議地界因得彼國國師傳授星躔之學云云按統和為遼聖宗年號遼史本紀其年無遣使高麗事其

二國外紀但稱統和三年詔東征高麗以遼
澤沮洳罷師亦無遣使議地界之文遼代貴
仕不出耶律氏蕭氏二族而遍檢列傳獨無
純名殆亦出于依托也文淵閣書目載有是
書一部不著冊數葉竹堂書目作五冊又不
著卷數外間別無傳本惟永樂大典所載始
末完具然計其篇頁不足五冊之數或葉盛
所記有訛歟中間論議精到剖析義理往往

造微為術家所宜參考惟所稱宮有偏正則
立說甚新而驗之殊多乖忤蓋天道甚遠非
人所能盡測故言命者但當得其大要而止
苟多出奇思曲意揣度以冀無所不合反至
於窒塞而不可通矣術家流弊往往坐此讀
者取其所長而畧其繁瑣可也乾隆四十六
年九月恭校上

總纂官臣紀昀臣陸錫熊臣孫士毅

總校官臣陸費墀

原序

大遼統和二年翰林學士耶律純以議地界事奉國書
使於高麗遼東至其國頗聞國師精於星躔之學具重
幣設威儀求見屢請不從一日自請於高麗國王曰臣
奉國書來此稔聞國師富於道德星命之學願借玉音
得遂一見以請所學何帝昌黎之遇大顛也國王遂命
一見既見之後往復數回前請曰微生跼伏北方聞國
師深於星命之度今日天幸得瞻毫相願北面從師聞

以一二以聳北方之學者亦是三生夙昔之幸不知可
乎國師曰何不可之有但學士平生論學有何所得吾
與學士從長商榷而已何以師為曰庸學得於生剋制
化之外亦有十條前有六條看根本後四條看流年其
一曰太歲尊神加臨管攝其二曰無中有曜弱處高強
其三曰得經失次細辨盈虛其四曰身傍母吉傍鬼者
凶其五曰同宮千里異宮尺寸其六曰黨母福多藏鬼
禍大其七曰元守雖詳流年猶急其八曰當生變曜流

年變星其九曰限併諸煞貴祿不臨其十曰流年諸星
無忽柔曜此十條者各有詳註未審如何國師曰十條
之說抑末矣本之則無今學士談星根本以宮主為重
耶度主為重耶曰得於平昔之講明以宮度兼論不可
用一而廢一也國師笑曰宮度兼論吾恐子於星度胃
中不能自斷何以斷人之禍福也且如命躔丑宮之牛
度宮土度金限行遇火一生一尅何以為斷又如命坐
寅宮尾火度木宮大限行遇水一生一尅何以為斷於

禍福何憑遂再進曰願棄所學而從師求教師曰吾嘗以近世談星者言宮不知度言度不知宮二者胥失矣吾於海上異人授我以偏正之垣於二十八宿之中分之曰一太陽五太陰六木六土六水二火二金之說學士曾聞之乎曰未也國師曰人生於地日月五行見於天其生值此七曜之吉則一生享福安榮遇七曜之凶則一生迫忙百不如意日月五星其為物也於天地間最大於天下萬物日主晝月主夜乃天之眼目也在天

有五星在地有五行人生在世五者一日不可缺觀星
談命苟不知此根本則為徒然徒學宮度無論之術何
以決人之禍福故十二宮有偏正之垣子宮以虛日鼠
為正垣鼠乃子垣之宮神非正垣而何也丑宮牛金牛
寅宮尾火虎卯宮房日兔辰宮亢金龍巳宮翼火蛇午
宮星日馬未宮鬼金羊申宮觜火猴酉宮昂日雞戌宮
婁金狗亥宮室火猪皆本宮之正垣此為千古不易之
論此談星之大根本可不盡知要妙哉所謂一太陽者

太陽君象天無二日民無二主惟星日馬乃太陽之正垣五太陰者后妃之象后妃嬪衆多宜太陰之五也故以鬼金羊為太陰之正垣其餘張心危畢月皆偏垣之月也六木者寅宮尾火虎亥宮室火猪為木正垣其餘斗奎井角皆偏垣之木也六土者子宮虛日丑宮牛金為土正垣其餘女氏胃柳皆偏垣也六水者巳宮翼火申宮觜火為水之正垣也其餘箕壁參軫水皆偏垣也二火者卯宮房日戌宮婁金為火之正垣二金者辰宮

亢金酉宮昴日為金之正垣天地之間水水土土隨寓而有隨所居而可得木滿山林土滿寰宇水滿江河隨處皆有至於金火則不可多得焉只有二火二金使金火如木水土之多則天下嘗有持刃縱火之患耳豈不為世道憂吾有偏正垣七政論并日月並明說計八篇又有二百字真經二十五題詳於學士十條者學士所舉十條人常聞常知也吾之諸論其金火者人所未聞未知也今以授子子欲行之當誓於天地鬼神不可輕泄

此天機玄妙吾得海上異人所傳而未嘗泄今予得吾之所傳若不寶而重之必招譴於天不可逃也乃對師焚香設誓三日後國師遂以諸論八篇與夫二百字真經二十五題授之百拜而寶之大遼統和二年八月十三日耶律純自識

欽定四庫全書

星命總括卷上

遼耶律純撰

二十八條斷例

四正宮神互相管攝四正者如日之虛房星昴木之角
斗井奎之數互相管攝凡看星辰先看主星落何方有
何生剋制化若論凶吉合依星辰而斷 同宮千里異
宮寸尺且如子上立命女虛危雖是同垣何止千里若
危十一危十二立命亥上危十三十四有尺寸之隔此

何可以異宮論也他倣此 二母爭權姑恤大過如水
命見水孛或臨本宮三合獨見方為福若同見二母爭
權反為禍餘倣此 一星得地初無二用或土宮立命
或命主土星在別處三合見火生土吉設若三合火見
金火性炎上便去尅金却不能生土餘倣此 水火相
戰其勢俱敗如水命火同在命或三合或十五度之內
相照雖火受水尅我亦不寧其勢俱敗餘倣此 日月
爭權到底無光如日為命主夜生本無光或與月同宮